

九龍司新建龍津義學敘

有因時制宜者出，相機勢，備經營，即事求治，而招攜懷遠之意以寓。蓋經濟之才，如此其難也。粵東素稱樂土，人文與中州相埒，貨財之所萃會，瓷舶之所駢集，富庶又甲於他省。新安特濱海邊。邑縣有官富司，尤濱海邊司耳。然衣之裔曰邊，器之羨曰邊。器敝自羨始，衣敝自裔始。則凡官邊地者，請共厥職，宜什伯中土；而厭溥之，獨何心歟？道光二十三年，夷務靖後，大吏據情入告，改官富為九龍分司。由近量移於遠，築城建署，聚居民以實之。雖備內，不專為禦外，而此中稟承廟謨，計安海宇，誠大有濟時之識於其間，而非苟為勞民傷財也。今年余奉調視事，巡檢許君文深來言，有龍津義學之建。副將王君鵬年，通判顧君章，喬大令應庚及許君捐銀若干為經始，地租歲可得若干以資生徒，仿古家逸之制，擇其尤者居焉。人心胥奮。嗟乎。此真即事求治，能以無形之險，固有形者也。今國家文教覃敷，武功赫耀，無遠弗屆。九龍民夷交涉，人情重貨寶而薄詩書，有以鼓舞作興，則士氣既伸，而外夷亦得觀感於絃誦聲明，以柔其獷悍之氣。所為漸被邊隅者，豈淺鮮哉？落成，司人以文請。既滋愧許君能助我不逮，而重為司人深無窮之望也。記之，俾勒於石。

道光丁未(1847)八月知新安縣事思唐王銘鼎撰

南海謝鐵摹刻

值事曾朝斌、吳穎才等嵌壁